



1-1-1670

## Constitutiones selectae: 1670-1925

---

### Recommended Citation

"Constitutiones selectae: 1670-1925" (1670). *Constitutions and Rules*. Paper 11.  
[http://via.library.depaul.edu/cm\\_construles/11](http://via.library.depaul.edu/cm_construles/11)

This Article is brought to you for free and open access by the Official Documents at Via Sapientiae. It has been accepted for inclusion in *Constitutions and Rules* by an authorized administrator of Via Sapientiae. For more information, please contact [mbernal2@depaul.edu](mailto:mbernal2@depaul.edu).

# CONSTITUTIONES SELECTAE

-----

## CONSTITUTIONUM SELECTARUM CONGREGATIONIS A MISSIONE CONFIRMATIO ET APPROBATIO.

**23 JUNII 1670**

**CLEMENS. P.P. X**

### **AD PERPETUAM REI MEMORIAM**

Ex injuncto nobis Divinitus Apostolicae Servitutis officio Congregationes personarum Ecclesiasticarum in Ecclesia Dei pie sancteque institutas, uberesque bonorum operum fructus adspirante Superni favoris auxilio proferre assidue satagentes in visceribus paternae charitatis gerimus, et illa quae pro felici prosperoque illarum regimine et gubernio, tuendaque et solidanda in eis pace, ac laudabilibus earum institutis studiosisque in via Domini progressibus fovendis et juvandis prudenter atque salubriter constituta esse noscuntur ut firma atque irrefragabili Stabilitate perennent, Apostolici muniminis praesidio, cum id a Nobis petitur, libenter roboramus. Exponi siquidem Nobis nuper fecerunt Dilecti Filii Superior Generalis et Praesbyteri Congregationis Missionis, quod ipsi alias in eorum Conventu Generali Congregati nonnullas Constitutiones ad conservandam in eadem Congregatione animorum concordiam primaevumque illius Institutum atque Spiritum firmiter constabiliendum et fovendum apprime conducibiles ediderunt quae a nonnullis Romanae Curiae Praelatis quibus felicis recordationis Clemens P. P. IX. Praedecessor Noster id negotii dederat, revisae ac emendatae et ad formam redactae fuerunt, tenoris qui sequitur, videlicet:

1° Superior Generalis Congregationis Missionis erit in officio perpetuus et omnimodam in tōtam Congregationem, id est in singulas domos, res et personas Superioritatem atque auctoritatem habebit, eo modo temperatam qui infra declaratur.

2° Tres vel quatuor Assistentes illi adjunget Conventus Generalis, atque Admonitorem dabit, omnes pluribus media parte suffragiis eligendos, quorum officium usque ad electionem alterius Superioris Generalis durabit ; Assistentium autem pares erunt Generalem ipsum opera et consilio juvare in regimine Congregationis, ita tamen ut facultas decernendi quae agenda fuerint, sit

penes ipsum Superiorem Generalem, exceptis casibus infra exprimendis, **in quibus requiritur Consensus Consilii, secundum Can. 534 et 655, qui sic se habent: Can. 534: “Firmo praescripto Can. 1531, si agatur de alienandis rebus pretiosis aliisque bonis, quorum valor superet summam triginta millium francorum se libellarum, vel de contrahendis debitis et obligationibus ultra indicatam summa, contractus vi caret, nisi beneplacitum apostolicum intercesserit; secus requiritur et sufficit licentia in scriptis data Superioris ad normam Constitutionum cum consensu sui Capituli, per secreta suffragia manifestato.” Can. 655: “Ad sententiam dimissionis ferendam, competens est Supremus Religionis vel monasticae Congregationis moderator cum suo Consilio seu Capitulo, quod saltem quatuor religiosi constet.”.**

3° Illius erit (**Superioris Generalis**) toti Congregationi praeesse, Visitatores et praefatae Congregationis tam Secretarium quam Procuratorem, Superiores Domorum caeterosque officiales ordinarios, Assistentibus suis et admonitore exceptis, commissarios etiam qui ordinarii officiales non sint, instituere, ~~nec non rationabili de causa sibi bene visa destituere, quibus omnibus eas impertietur facultates quae in Regulis particularibus ejusque officii continentur :~~ Quas tamen facultates augere vel minuere, potest, cum ita in Domino expedire judicaverit, **ipsi vero ad reddendam ei suae administrationis rationem tenebuntur. locales tamen Superiores ad normam Can. 505.**

4° Ex quo fuerit a Conventu Generali electus jus habebit, tum in ipso Conventu, tum in aliis quibuscumque, duo ferendi suffragia sive secreta illa fuerint, sive non secreta, atque praerogativam in paritate suffragiorum non secretorum ; si quid tamen ab ipso et à quibusdam a Conventu deputatus suffragiorum non secretorum via definiendum erit, unico tantum cum praerogativa in paritate gaudebit. In electione quoque duorum Assistentium et quatuor Deputatorum ad seligenda proposita unicum habebit suffragium, sed sine praerogativa.

5° Licet jus plenum decernendi et statuendi quae ad Congregationis progressum felixque regimen conducere videbuntur apud Conventum Generalem resideat concurrente majori suffragiorum parte : poterit tamen quoque Superior Generalis ordinationes et statuta condere, modo Decretis Conventuum Generalium non repugnent, quae abrogare vel immutare nullatenus potest, nisi de consensu Generalis Conventus, modo etiam licita sint et honesta nec Sacris Canonibus adversantia, aut contraria Constitutionibus Apostolicis, Bullis seu Brevibus Summorum Pontificum quibus praefatae Congregationis Institutum, Constitutiones, Regulae et munia declarantur, aut confirmantur, nec speciatim his articulis quos vel leviter immutare nec Superiori nec Conventui Generali licebit. Ordinationes autem et statuta hujusmodi a Superiore Generali edita observanda erunt, donec Conventus Generalis aliud decreverit, penes quem est potestas vim illis detrahendi aut etiam addendi ut in posterum obligent.

6° Idem Superior Generalis in Congregationem admittere poterit quos idoneos existimaverit, **servato tamen Can. 542, et indignos post emissa vota dimittere, si agatur de dimissione improprie dictae, id est de licentia discedendi cum dispensatione votorum, sponte consentientibus aut postulantibus indultam. Sed quoad indignorum invidiosam electionem, servandus est ordo can. 646-672, et etiam can. 681 descriptus.** ~~si retinent non posse absque magno praedictae Congregationis damno ipse et ejus Assistentes ad plura suffragia judicaverint, ita tamen ut ipsi competat unicum suffragium cum praerogativa in paritate.~~

7° Licebit ei (**Superior Generalis**) quoslibet Contractus, servatis de jure alias servandis, inire, **secundum normam Cann. 532-537.** ~~–; in rebus tamen maximi momenti de consensu suorum Assistentium ad plura nimirum suffragia cum sua ipsius praerogativa in paritate.~~

8° Admittere poterit de consensu Ordinarii **Domos et** fundationes **pro domibus, servato tamen can. 497, et Domos** non tamen eas alienare, abolere, aut ~~ali~~ **alias** transferre nisi de consensu Conventus Generalis, servatis semper de jure servandis, **nimirum pro suppressione domus can. 498, et pro alienatione can. 534.** Quod si dissolvendi aliquam Domum aut fundationem deserendi ~~necessitas tanta~~ urgeat **tanta necessitas**, ut Conventus Generalis expectari non ~~possit~~ **poterit**, tunc res decernetur iudicio ipsius Generalis, Assistentium, Visitorum ~~qui fuerint in Europa, Secretarii etiam Congregationis et Procuratoris, aut saltem majoris ipsorum partis,~~ servatis ut supra de Jure servandis.

9° Dignitates Ecclesiasticas absque consensu Conventus Generalis acceptare non poterit, nisi summus Pontifex id in virtute sanctae oboedientiae praecipiat.

10° Penes illum erit facultas Conventum Generalem convocandi, ipsum dirigendi et Congregatos de consensu tamen ipsius Conventus dimittendi.

11° Porro Conventus Generalis ob causas quascumque congregatus, Superiori Generali superior erit; praetereaque Congregatio in eundem auctoritatem potestatemque habebit, in duobus potissimum casibus, nempe si inutilis foret ad gubernationem, vel gravissimum aliquod peccatum externum committeret; primo enim casu, Congregationis erit substituere illi Vicarium Generalem, si ipse eum nominare non posset aut nollet; secundo vero casu qui tamen speratur non eventurus, potest eadem Congregatio eum deponere; quod quidem ultimum ut legitime fiat, suffragia duas tertias partes excedere debent ; ut vero substituatur illi Vicarius, satis erit si major pars Congregatorum in id consenserit.

12° Defuncto autem Superiore Generali, ejus erit quem ipse in Vicarium Generalem nominaverit, vel primi Assistentis, si Vicarius nominatus non fuerit, aut officio suo fungi non possit, Congregationem regere usque ad electionem novi Superioris Generalis; denique pro ejusdem electione Conventum Generalem intra sex menses, nisi gravis necessitas dilationem aliquam exigeret, convocare, eidem praesidere donec Superior Generalis fuerit electus.

13° Praeter praedictum casum electionis, Conventus Generalis celebrabitur in casibus sequentibus: 1° Singulis duodecim annis post ultimum Conventum Generalem. 2° Quotiescumque Superior Generalis ipsum ob res magni momenti indicendum judicaverit. 3° Si assistentes cum Visitoribus ~~qui sunt in Europa~~ ipsum esse necessario cogendum ad plura suffragia censuerint in causa depositionis ut supra. 4° Si ipsemet Generalis, ejus Assistentes, Congregationisque Secretarius et Procurator cum Deputatis qui sexto anno post ultimum Conventum Generalem a Singulis Europae Provinciis mittuntur, ipsum cogendum esse pluribus suffragiis decreverint.

14° Ob quamcumque vero causam celebretur, intererunt ei, et jus suffragii habebunt Superior Generalis, nisi forte de ipsius depositione ageretur, sive Vicarius itidem Generalis, Assistentes,

Visitatores seu eorum loco Vice-Visitatores Congregationis tam Secretarius quam Procurator, et duo sacerdotes ex singulis Provinciis, quos legitime a Conventibus Provincialibus pluribus suffragiis electos esse constabit, si tamen Conventus habeatur pro eligendo Superiore Generali, praedicti Secretarius et Procurator Congregationis intererunt ei tantum post peractam dicti Superioris Generalis electionem, nisi alio titulo ei interesse debeant.

15° Non proponentur Conventui Generali nisi ea quae vel Superior Generalis proponere voluerit, vel proponenda censuerint ad plura suffragia ipse scilicet Superior Generalis, duo ejusdem Assistentes, et quatuor de numero Congregatorum ad plura suffragia electi.

16° Procedetur per suffragia secreta ad electionem Superioris Generalis quae mediam partem necessario excedent, ut valide electus habeatur; quod si post quinque scrutinia electio facta non fuerit, totum illud negotium, si duae saltem tertiae partes electorum in id consenserint referendum erit ad quinque compromissarios, deinde vero si opus fuerit, etiam ad plures modo omnes sint de Congregatis et numero impares praedicti autem compromissarii eligendi erunt ad plura media parte suffragia secreta, et ipso quoque Superiorem Generalem eligent ad plura medietate similiter suffragia itidem secreta, ex iis tamen qui saltem quatuor suffragia in ultimo Scrutinio habuerint. Porro tam compromissarii quam caeteri electores antequam suum suffragium dent pro eligendo Superiore Generali, juramentum praestabunt de digniore eligendo, nec eligere poterunt nisi unum ex numero sacerdotum qui duodecim, ut minimum, annis completis post emissa vota in Congregatione vixerint, **et satisfaciant conditionibus can. 504 requisitis.**

17° Ut in re tanti momenti omnis ambitus tollatur occasio, excommunicationis latae sententiae paenam incurret quisvis ex Nostris qui ab obitu Superioris Generalis cum aliquo externo egerit eo fine, ut sive sui sive alterius promotionem ad Generalatum, aut ab eo alterius exclusionem procuret, vel quocumque modo electionis libertatem impediat aut perturbet; item qui aliquem ex Nostris ad suam ipsius electionem ambitiose sollicitando Generalatum affectaverit, vel qui ad ambientis inductionem pro ejusdem electione quempiam ex Nostris sollicitaverit.

18° Immediate vero ante electionem Vicarius Generalis congregatos absolvet in quantum opus fuerit ab omni vinculo excommunicationis, suspensionis et interdicti et a quibusvis aliis sententiis, censuris et poenis ad effectum legitimae electionis duntaxat; statimque ipso Vicarius idem absolutionis beneficium et ad eundem effectum a Congregatorum antiquissimo ratione receptionis in Congregationem percipiet.

19° Post legitimam promulgationem electionis Superioris Generalis factae, vel ab omnibus electoribus, vel a Compromissariis ut supra, omnes acquiescere tenebuntur, nec ulli fas erit suffragium suum revocare, aut novam electionem tentare, aut contra ejusmodi electionem quocumque pretextu protestam.

20° Quandocumque tandem habeatur Conventus Generalis, si contingat eo quavis de causa indicto, vel jam coacto, vel statim post ipsum dissolutum Superiorem Generalem, vel aliquem ex ejus Assistentibus, vel ipsius Admonitorem e vivis decedere, vel si accedat Superiorem Generalem in eo statu esse qui Vicarium exigit; in iis casibus electi a Singulis Provinciis pro Conventu Generali jus habebunt absque nova convocatione, vel deputatione Conventuum

Provincialium eligendi novum Superiorem Generalem, vel Vicarium, vel Assistentem, vel Admonitorem. Idem jus habebunt pro sola electione Superioris Generalis, etiam post aliquorum discessum, si facile et intra breve tempus revocari possint.

Constitutiones revisas, ac emendatas, et ad formam redactas, ut supra, Congregatio Praelatorum deputata censuit, posse confirmari cum illarum insertione, si Sanctissimo placuerit; Et facta relatione S. Sanctitas annuit die 25 aug. 1669.

S(tephanus) Ugolinus, patriarcha Constantinopolitanus;  
F(ranciscus) Nerlius, archiepiscopo Florentinus  
C(arolus de Vecchis), archiepiscopus Athenarum  
G(audentius) Polus, episcopus Amerinensis;  
P. Philippus de Rubeis.

Cum autem, sicut eadem expositio subjungebat, dicti exponentes easdem Constitutiones, quo firmius subsistant, et serventur exactius Apostolicae Confirmationis Nostrae patrocinio communiri summopere desiderent; Nos memoratam Congregationem in suo laudabili Instituto confovere, dictosque exponentes specialis favore gratiae prosequi volentes, et eorum singulares personas a quibusvis Excommunicationis, Suspensionis, interdicti, aliisque Ecclesiasticis sententiis, censuris, et paenis a jure vel ab homine quavis occasione vel causa latis, si quibus quomodolibet innodati existunt, ad effectum duntaxat praesentium consequendum harum serie absolventes et absolutos fore censentes, supplicationibus eorum nomine nobis super hoc humiliter porrectis inclinati, omnes et singulas Constitutiones praeinsertas auctoritate Apostolica tenore praesentium approbamus et confirmamus, illisque inviolabilis firmitatis Apostolicae robur adjicimus, ac omnes, et singulos juris et facti defectus, si qui desuper quomodolibet intervenerint, supplemus.

Decernentes easdem Constitutiones praeinsertas, ac praesentes litteras semper firmas, validas, et efficaces existero, et fore, suosque plenarios et integros effectus sortiri et obtinere, ac illis ad quos spectat, et pro tempore quandocumque spectabit, plenissime suffragari, et ab eis respective inviolabiliter observari; sicque in praemissis per quemcumque iudices ordinarios et delegatos, etiam causarum Palatii Apostolici auditores judicari et definiri debere, ac irritum, et inane si quis secus super his à quoquam quavis auctoritate scienter, vel ignoranter contigerit attentari.

Nonobstantibus Constitutionibus et Ordinationibus Apostolicis ac quatenus opus sit dictae Congregationis etiam juramento confirmatione Apostolica, vel quavis firmitate alia roboratis, Statutis, et Consuetudinibus, privilegiis quoque, Indultis, et Litteris Apostolicis etiam eidem Congregationis, ejusque Superioni Generali, Praesbyteris, et aliis personis quibuslibet in contrarium praemissorum quomodolibet concessis, confirmatis, et innovatis; Quibus omnibus, et singulis illorum tenores praesentibus pro plene, et sufficienter expressis et ad verbum insertis habentes illis alias in suo robore permansuris ad praemissorum effectum hac vice duntaxat specialiter, et expresse derogamus caeterisque contrariis quibuscumque. Volumus autem ut earumdem praesentium litterarum transumptis, seu exemplis etiam impressis, manu alicujus notarii publici subscriptis, et sigillo personae in Ecclesiastica Dignitate constitutae munitis eadem prorsus fides in iudicio et extra adhibeatur quae praesentibus adhiberetur, si forent exhibitae vel ostensae.

Datum Romae apud S. Petrum sub annulo Piscatoris die 2. Junii 1670, Pontificatus nostri anno primo.

Signatum. J. G. Slusius et sigillatum annulo Piscatoris.

*Source:* Schema Constitutionum Congregationis a Missione approbationi Conventus Generalis XXXI subjiciendum, *Paris, 1947; pp. 103-105.*

NOTES:

Text in green was added between the 1669 revision and the 1670 approval.

Text in red was approved by the General Assembly of 1925.

[John E. Rybolt, C.M., March 2007]